

आकाशवाणी

- वक्फ संशोधन बिल गी लोकसभा नै पास करी दित्ता ऐ। 288 सदस्येँ इस बिल दे पक्ख च जिसलै के 232 सदस्येँ एह्दे बरोध च वोट कीता। वक्फ संशोधन बिल दा मकसद विरासती थाहरेँ दी सुरक्षा ते समाजी कल्याण गी बढ़ावा देने दे कन्नेँ गै वक्फ दिऐं संपत्तिऐं दा प्रबंधन बवस्थित करना बी ऐ।
- लोकसभा नै मणिपुर च राष्ट्रपति शासन लाए जाने सरबंधी संवैधानिक प्रस्ताव गी मंजूरी देई दित्ती ऐ।
- प्रधानमंत्री नरेन्द्र मोदी होर 6में बिमस्टेक शिखर सम्मेलन च हिस्सा लैक्ने लेई अज्ज बड्डलै थाईलैंड दी द'ऊं दिनें दी जात्तरा पर रवाना होई गे न।
- अमरीका दे राष्ट्रपति डॉनल्ड ट्रम्प होरेँ भारत सने केइएँ मुख्येँ पर 26 फीसद दे स्हाबै बरोबर पारस्परिक शुल्क लाने दा ऐलान कीता ऐ।
- म्यांमा दी सत्ता पर काबिज फौज नै राहत ते बचाऽ कम्मं लेई देसै च चलै करदे गृह युद्ध पर आरजी तौरा पर विराम लाने दा ऐलान कीता ऐ।
- आईपीएल टी20 क्रिकेट प्रतियोगिता च जंदी रातीं बेंगलुरु दे एम. चिन्नास्वामी स्टेडियम च गुजरात टाईटन्स नै रॉयल चैलेंजर्स बेंगलुरु गी 8 विकेटेँ कन्नेँ हराई दित्ता ऐ।

<><><><><><>

LS Passes Waqf Bill

लोकसभा नै विपक्ष दे संशोधनें गी खारज करदे होई वक्फ (संशोधन) विधेयक, 2025 पास करी दित्ता ऐ। लोकसभा च 288 सदस्येँ विधेयक दे पक्ख च जदके 232 सदस्येँ एह्दे बरोध च मतदान कीता। लोकसभा च 12 घैंटेँ शा मते समेँ तगर चिरेँ रातीं तोहड़ी इस बिल पर चर्चा होई। वक्फ (संशोधन) विधेयक, 2025 दा मकसद विरासती थाहरेँ दी सुरक्षा ते समाजी कल्याण गी बढ़ावा देने दे कन्नेँ गै वक्फ संपत्तियेँ दा प्रबंधन सुबवस्थित करना ऐ। एह्दा मकसद संपत्ति प्रबंधन च पारदर्शिता बधाना, वक्फ बोर्डेँ ते मुकामी अधिकारियेँ बश्कार तालमेल कायम करना ते सरबंधत पक्खेँ दे अधिकारेँ दी राक्खी करना ऐ।

विधेयक च मुस्लिम महिलाएं, खास तौर उप्पर विधवाएं ते तलाकशुदा महिलाएं दी आर्थिक ते समाजी स्थिति च सुधार दा बी मकसद ऐ। विधेयक दा उद्देश्य वक्फ बोर्ड गी मता समावेशी बनाना ऐ, जेहदे'नै बेहतर वक्फ शासन ते फैसले लैने च बक्ख-बक्ख मुस्लिम संप्रदायें दी नुमाइंदगी होऐ। विधेयक पर चर्चा दा परता दिं'दे होई अल्पसंख्यक मामलें दे मंत्री किरें रिजीजू होरें आखेआ जे एह धारणा गलत ऐ जे गैर-मुस्लिम वक्फ बोर्ड दे कम्मकाज च दखलंदाजी करडन। उ'नें आखेआ जे भारत अल्पसंख्यकें लेई सभ्मनें शा सुरक्षित मुख्य ऐ। सरकार पर अल्पसंख्यक बरोधी होने दे विपक्ष दे आरोप गी खारज करदे होई उ'नें आखेआ जे नरेंद्र मोदी सरकार नै पारसियें ज्नेह सभ्मनें लौहके अल्पसंख्यक समुदायें दा बी ख्याल रक्खेआ ऐ। इस बिल गी गैर-संवैधानिक करार देने आहले बरोधी घडे दे सदस्यें दे आरोपें दा परता दिं'दे होई उ'नें आखेआ जे बरोधी सदस्य एहदे पिच्छे कोई वजह नेई दस्सी सके न। एहदे शा पैहले एह बिल सदन च पेश करदे होई श्री रिजीजू होरें आखेआ जे एहदा मुसलमानें दी धार्मिक प्रथाएं कन्नै कोई लैना-देना नेई ऐ ते एह छड़ा वक्फ बोर्ड कन्नै सरबंधत संपत्तियें कन्नै जुडे दा ऐ। उ'नें विपक्ष पर आरोप लाया जे ओह इस बिल दे बारै च लोकें गी गुमराह करा'रदा ऐ। बैहस च हिस्सा लेंदे होई गृह मंत्री अमित शाह होरें आखेआ जे वक्फ च कोई बी गैर-मुस्लिम नेई औग। उ'नें आखेआ जे धार्मिक संस्थाएं दे प्रबंधन च कुसै गैर-मुस्लिम गी शामिल करने दा कोई प्रावधान नेई ऐ।

<><><><><><><>

Waqf Bill Munambam

लोकसभा च कल चिरें रातीं वक्फ संशोधन बिल पास होने दे बाद कोच्चि दे नेडे मुनंबम च समुंदरी कंड्ढे आहले ग्रांस दे लोकें नरेंद्र मोदी सरकार दे समर्थन च बम्ब-पटाके चलांदे होई जशन मनाया। ग्रामीण लोकें मेद बुज्झी जे हून उ'नेंगी अपने घरें शा बेदखल नेई होना पौग। 600 शा मते ग्रामीण अपनी रिहायशी संपत्तियें पर राज्य वक्फ बोर्ड दे दावे दे खलाफ पिच्छले 5एं म्हीनें शा मते समें थमां आंदोलन करै करदे न। लोकसभा च वक्फ विधेयक पर जारी बैहस दा परता दिं'दे होई अल्पसंख्यक मामलें दे मंत्री किरें रिजीजू होरें मुनंबम मुद्दे दा जिक्र कीता ते आखेआ जे संसद आसेआ बिल पास होने परैन्त विवाद आहले इस मामले दा हल निकली जाह्ग।

<><><><><><><>

Manipur Prez Rule

लोकसभा नै मणिपुर च राष्ट्रपति शासन लाने जाने सरबंधे संवैधानिक प्रस्ताह गी मंजूरी देइ दित्ती ऐ। लोकसभा च इस प्रस्ताह पर सरसरी चर्चा होई जेह्दे च कांग्रेस दे शशी थरूर, समाज वादी पार्टी दे लालजी वर्मा, शिवसेना उद्धव गुट दे अरविंद सांवत, तृणमूल कांग्रेस दिएं सायोनी घोष ते किश होर सांसदें हिस्सा लैता। इनें सब्बने मिंबरें राज्य च जारी हिंसा ते उत्थें दे लोकें गी पेश आवा'रदिएं दिक्कतें कठनाइएं दा मुद्दा पुट्टेआ। सदन च संवैधानिक प्रस्ताह पर चर्चा दे परते च केन्द्री गृहमंत्री अमित शाह होरें आखेआ जे सरकार मणिपुर च रमानदारी ते सामान्य हालात ब्हाल करने लेई हर मुमकिन जतन करै करदी ऐ। उनें आखेआ जे सरकार दी पैहली तरजीह् गै उत्थें रमानदारी ब्हाल करना ऐ। गृहमंत्री होरें आखेआ जे पिछले 4 म्हीने च उत्थुआं उेसी कोई हिंसक खबर हासल नेई होई जेह्दे च इक बी जने दी मौत होई दी होए।

<><><><><><>

PM-Thailand

प्रधानमंत्री नरेन्द्र मोदी होर 6में बिम्स्टेक शिखर सम्मेलन च हिस्सा लैने लेई अज्ज बडलै थाईलैंड दी इक दिने दी यात्रा पर रवाना होई गे न। 2016 ते 2019 दे बाद प्रधानमंत्री मोदी हुंदा थाईलैंड दा एह त्रीया दौरा होग। मोदी हुंदा अज्ज संजा'लै बैकांक च थाईलैंड दे प्रधानमंत्री पैतोंगतार्न शिनवात्रा हुंदे नै दपक्खी बैठक लाने दा कार्यक्रम ऐ। दवै नेता दौनें मुख्खें बश्कार सरबंधे च होई दी प्रगति दी समीक्षा करगंन ते भारत थाईलैंड दपक्खी सांझ-भ्याली गी होर निगगर बनाने दे उपाएं पर सोच बचार करगंन। एह्दे अलावा दवै नेता क्षेत्रीय ते बहुपक्खी मुद्दें पर बी गल्लबात करगंन। इस दरान केई दपक्खी समझौते पर दस्तखत कीते जाने दी बी मेद ऐ। कल्लै थमां शुरू होआ'रदे बिम्स्टेक शिखर सम्मेलन दा विषय सार ऐ "बिम्स्टेक-समृद्ध लचीला ते मुक्त"। इस शिखर सम्मेलन च बैंनकाँक विजन-2030 पर सैह्मति बनाइयै इसी अपनाया जाग ते बिम्स्टेक दे भविक्ख दी दिशा तैह् करने लेई बिम्स्टेक दे रसूरदार व्यक्तिएं दे समूह आस्सेआ तैआर रिपोर्ट दा बी समर्थन कीता जाग। बिम्स्टेक शिखर सम्मेलन दे बाद मोदी होर कल श्रीलंका दे राष्ट्रपति अनुर कुमार दिसानायके दे साद्दे पर त्रऊं दिने दे श्रीलंका दौरे पर रवाना होई जांगन।

<><><><><><>

Trump

अमरीकी राष्ट्रपति डोनाल्ड ट्रंप होरें भारत सने केई मुल्खें पर पारस्परिक शुल्क यानि परते च टैक्स लाने दी घोषणा कीती ऐ, जेह्दे मताबक इनें मुल्खें थमां अमरीका च नोआए जाने आले माल समेयान पर 26 प्रतिशत शुल्क लाया जाग। व्हाईट हाउस दे रोजगार्डन च इक संवाददाता सम्मेलन च ट्रंप होरें उआं आखेआ जे एह टैक्स पूरी चाल्ली पारम्पारिक नेई होग यानि ऐसा नेई कि जेकर कोई मुल्ख अमरीका पर जिन्ने प्रतिशत आयात शुल्क लांदा ऐ ते परते च अमरीका बी भलेया उन्ना गै टैक्स लाग ते ओसतन अमरीका उनें मुल्खें आस्सेआ लाए गेदे टैक्सें दा लगभग अद्धा गै वसूल करोग। उनें आखेआ जे अमरीका गैर टैरिफ रूकावटें समेत सब्बने टैक्सें दिएं सांझिं ते कुल दरें दी गिनतरी करोग ते उनें मुल्खें आस्सेआ अमरीका पर लाए गेदे टैक्सें दा लगभग अद्धा शुल्क उंदे पर लाग। राष्ट्रपति ट्रंप होरें यूरोपी संघ थमां आयात करने पर 20 प्रतिशत ते बरतानिया थमां आयात पर 10 प्रतिशत इम्पोर्ट ड्यूटी लाने दी बी घोषणा कीती जेह्दे अमरीका दे दऊं प्रमुख बपारिक भेया लते सैहयोगी मुल्ख न।

<><><><><><><>

Myanmar Ceasefire

म्यांमा च 7 इशारिया 7 दी तीव्रता दे जबरदस्त भूंचाल दे बाद मरने आहलें दी गिनतरी बधियै त्रै ज्हार त्रै होई गेई ऐ ते करीब 4 ज्हार 500 लोक घाऽल न। तोआई म्यांमा दी सत्ता पर काबिज फौज नै राहत ते बचाऽ कम्मं लेई मुल्खै च चला'रदे गृह युद्ध पर आरजी तौरा पर विराम लाने दा ऐलान कीता ऐ। कल चिरें रातीं सरकारी टेलीविजन पर फौजी नेताएं दी इस चानचक्क घोषणा च आखेआ गेआ जे भूंचाल करी प्रभावत लोकें दे प्रति हमदर्दी दर्शाने लेई 22 अप्रैल तगर युद्ध विराम लागू रौहग। इस ऐलान दे बाद इकतरफा अस्थाई युद्ध विराम लागू होई गेआ। सेना नै चेतावनी जारी कीती जे जंग च शामिल सब्भै गुट हमला करने थमां बचन नेई ते उ'दे खलाफ बनकदी कार्रवाई कीती जाह्ग।

<><><><><><><>

IPL

आईपीएल च अज्ज कोलकाता दे ईडन गार्डन च सनराइजर्स हैदराबाद दा मकाबला मूजदा चैंपियन कोलकाता नाईट राईडर्स कन्नै होग। मैच संजा साढ़े 7 बजे शुरू होग। तोआई कल खेड्डे गेदे इक मैच च गुजरात टाइटंस नै रॉयल चैलेंजर्स बेंगलुरु गी 8णं विकटें कन्नै हराई दित्ता।

बैंगलुरु दे एम.चिन्ना स्वामी स्टेडियम च खेड्डे गेदे इस मैच च बैंगलुरु दी टीम नै 20एं ओवरें च 8एं विकटें दे नुकसान पर 169 रंज बनाए। जेह्दे परते च गुजरात टाइंट्स नै 17.5 ओवरें गै 2 विकटां मोआइयै 170 रंज दा लक्ष्य हासल करी लैता। गुजरात टाइंट्स दी तरफा जोस बटलर नै 39 गेदें च 73 रंज बनाए ते खीरे तगर नाट—आउट रेह् जिसलै जे मोहम्मद शिराज नै सब्बने शा मतियां त्रै विकटां हासल कीतियां। उनेंगी प्लेयर ऑफ द मैच घोषत कीता गेआ।

<><><><><><>